

清

史

稿

清史稿

列傳一百九十九

左宗棠

左宗棠字季高湖南湘陰人父親瀾廩生有學行宗棠道光十二年舉人三試禮部不第遂絕意仕進究心輿地兵法喜爲壯語驚衆名在公卿間嘗以諸葛亮自比人目其狂也胡林翼亟稱之謂橫覽九州更無才出其右者年且四十顧謂所親曰非夢卜復求殆無幸矣咸豐初廣西盜起張亮基巡撫湖南禮辟不就林翼敦勸之乃出叙守長沙功由知縣擢同知直隸州亮基移撫山東宗棠歸隱梓木洞賂秉章至湖南復以計刦之出佐軍幕倚之如左右手僚屬白事輒問季高先生云何由是忌者日衆謗議四起而名日聞同里郭嵩燾官編修一日文宗召問若識舉人左宗棠乎何久不出也年幾何矣過此精力已衰汝可爲書諭吾意當及時出爲吾辦賊林翼聞而喜曰夢卜復求時至矣六年曾國藩克武昌奏陳宗棠濟師濟餉功詔以兵部郎中用俄加四品卿銜會秉章劾罷總兵樊燮燮構於總督官文爲蜚語上聞召宗棠對簿武昌秉章疏爭

之不得林翼國藩皆言宗棠無罪且薦其才可大用詹事潘祖蔭亦誦言總督惑於浮辭故得不逮俄而朝旨下命以四品京堂從國藩治軍初國藩創立湘軍諸軍遵其管制獨王鑫不用宗棠募五千人參用鑫法號曰楚軍十年八月宗棠既成軍而東僞翼王石達開竄四川詔移師討蜀國藩林翼以江皖事急合疏留之時國藩進兵皖南駐祁門僞侍王李世賢忠王李秀成糾衆數十萬圍祁門宗棠率楚軍道江西轉戰而前遂克德興婺源賊趨浮梁景德鎮斷祁門餉道宗棠還師擊之大戰於樂平鄱陽僵尸十餘萬世賢易服逃而徽州賊亦遁浙江自是江皖軍勢始振十一年詔授太常寺卿襄辦江南軍務乃率楚軍八千人東援浙朝命國藩節制浙江國藩薦宗棠足任浙事宗棠部將名者劉典王開來王文瑞王沐數軍單薄不足資戰守乃奏調蔣益澧於廣西劉培元魏喻義於湖南皆未至而宗棠以數千人策應七百餘里指揮若定國藩服其整暇已而杭州陷復疏薦之遂授浙江巡撫時浙地唯湖衢二州未陷賊國藩與宗棠計以保徽州固饒廣爲根本奏以三府屬縣賦供其軍設婺源景德

河口三稅局神之三府防軍悉隸宗棠賊大舉犯婺源親督軍敗之同治元年正月詔促自衛規浙宗棠奏言行軍之法必避長圍防後路臣軍入衢則徽婺疎虞又成糧盡援絕之勢今由婺源攻開化分軍扼華埠收遂安使饒廣相庇以安然後可以制賊而不爲賊制二月克遂安世賢自金華犯衢州連擊敗之而皖南賊復陷寧國遣文瑞往援克績溪十一月喻義克嚴州二年正月益澄及高連陞熊建益王德榜余佩玉等克金華紹興浙東諸郡縣皆定杭州賊震怖悉衆拒富陽時諸軍爭議乘勝取杭城宗棠不喜攻堅謂皖南賊勢猶盛治寇以殄滅爲期勿貪近功乃自金華進軍嚴州令劉典將八千人會文瑞防徽州以培元德榜駐淳安開化而益澄攻富陽勦罷道府及失守將吏十七人舉浙士吳觀禮等振荒招墾足裕軍食四月授浙閩總督兼巡撫事劉典軍既至皖南遂留屯益澄攻富陽軍僅萬餘人皆病疫宗棠亦患瘡困憊富陽圍久不下乃簡練舊浙軍兼募外國軍助之攻七月李鴻章江蘇軍入浙攻嘉善嘉興寇北援於是水陸大舉攻富陽克之益澄等長驅擄杭州魏喻義康國器攻餘

杭宗棠以杭賊恃餘杭爲犄角非先下餘杭收海甯不能斷嘉湖援濟躬至餘杭視師是時皖賊古隆賢反正官軍連下建平高淳諸邑金陵賊呼秀成入謀他竄獨世賢踞溧陽與廣德賊比中梗官軍鴻章既克嘉善上言當益軍攻嘉興會浙師取常州而廣德賊已由甯國竄浙宗棠慮賊分擾江西福建乃檄張運蘭率所部趨福建召劉典防江西海甯賊蔡元隆以城降更名元吉後遂爲驍將三年二月元吉會江蘇軍克嘉興杭州賊陳炯文勢蹙約降猶慮計中變乘雨急攻之夜啟門遁杭州復餘杭賊汪海洋亦東走捷聞加太子少保銜賜黃馬褂移駐省城申軍禁招商開市停杭關稅減杭嘉湖稅三之一登漕爲布政使亦輕財致士一時翕然稱之羣賊聚湖州乃移軍合圍先攻菱湖三月江蘇軍克常州賊敗竄徽婺趨江西世賢踞崇仁海洋踞東鄉宗棠以賊入江西爲腹心患奏請楊岳斌督江西皖南軍以劉典副從之六月會國荃克江甯洪秀全子福瑱奔湖州俄復潰走燦於南昌七月克湖州盡定浙地論功封一等恪靖伯餘賊散走徽甯江西廣東折入汀州福建大震乃奏請之總督任以益

澄護巡撫增調德榜軍至閩四年三月江蘇軍郭松林來會師賊棄漳州出大埔五月進攻永定世賢海洋既屢敗傷精銳過牛歸誠者三萬宗棠進屯漳州逼賊武平於是賊竄廣東之鎮平而福建亦定乃檄康國器關鎮平兩軍入粵王開琳一軍入贛防江西劉典軍趨南安防湖南留高連陞黃少春軍武平伺賊進退六月賊大舉犯武平力戰卻之世賢投海洋爲所戕賊黨益猜貳詔以宗棠節制三省諸軍十月賊陷嘉應宗棠移屯和平琯溪德榜慮帥屯孤懸自請當中路劉典聞德榜軍趨前亦引軍疾進猝遇賊敗賊追典掠德榜屯而過槍環擊之輒反走是夜降者逾四萬言海洋中噉死矣士氣愈奮時鮑超軍亦至賊出拒又大敗之合閩浙江粵軍圍嘉應十二月賊開城遁扼諸屯不得走跪乞免者六萬餘俘斬賊將七百三十四首級可計數者萬六千詔錫雙眼花翎五年正月凱旋宗棠以粵寇既平首議減兵併餉加給練兵又以海禁開非製備船械不能圖自強乃創船廠馬尾山下薦起沈葆楨主其事會王師征西陲回亂久無功詔宗棠移督陝甘十月簡所部三千人西發令劉典別募三千

人期會漢口中途以西捻張總愚竄陝西命先入秦剿賊陝甘回衆數至百萬與捻合宗棠行次武昌上奏曰臣維東南戰事利在舟西北戰事利在馬捻回馬隊馳騁平原官軍以步隊當之必無幸矣以馬力言西產不若北產之健捻馬多北產故捻之戰悍於回臣軍止六千今擬購口北良馬習練馬隊兼製雙輪礮車由襄鄧出紫荆關徑商州以赴陝西經營屯田爲久遠之規是故進兵陝西必先清關外之賊進兵甘肅必先清陝西之賊駐兵蘭州必先清各路之賊然後餽餉常通師行無阻至於進止久速隨機赴勢伏乞假臣便宜寬其歲月俾得從容規畫以要其成六年春提兵萬二千以西議以礮車制賊馬而以馬隊當步賊捻倏見礮車皆不戰狂奔時陝西巡撫劉蓉已解任總督楊岳斌請歸益急詔甯夏將軍穆圖善署總督宗棠以欽差大臣督軍務分軍三道入關而皖南鎮總兵劉松山率老湘軍九千人援陝山西按察使陳湜主河防其軍皆屬焉松山旣屢敗捻又合蜀軍將黃鼎皖軍將郭寶昌大破之富平捻掠三原沿渭北東趨回則分黨西犯廣集北山宗棠以捻強於回當先制捻檄諸

軍憑河結營期蹙而殲之涇洛間捻乘軍未集又折而西渡涇渭竄豫鄂已而大軍進逼勢不復能南乃趨白水乘大風雨挺走入北山宗棠防捻回合勢且北山荒瘠師行糧不繼因急扼耀州十月捻敗走宜川別黨果竄耀州合回匪攻同官留防軍不能禦與連陞軍馳救大破之諸軍將雖屢敗捻終牽於回師行滯而捻大衆在宜川者益北擾延長掠綏德趨葭州回亦自延安出陷綏德宗棠自以延綏迭失上書請罪部議革職時北山及扶岐汧隴邠鳳諸回所在響應捻自南而北千有餘里回自西而東亦千有餘里陝西主客軍能戰者不及五萬然回當之輒敗松山等克綏德回走米脂捻復分道南竄於是劉厚基出東北追回松山等循西岸要捻師抵宜川回大出遮官軍留戰一日破之而捻遂取間道逾山至壺口乘冰橋渡河宗棠奉朝旨山右毗連畿輔令自率五千人赴援以劉典代督陝甘軍六年十二月捻自垣曲入河南登北趨定州游騎犯保定京師戒嚴詔切責督兵大臣自宗棠鴻章及河南巡撫李鶴年直隸總督官文皆奪職宗棠至保定松山等連破賊深祁饒管當是時捻馳驚數百

里間由直隸竄河南山東已復渡運越吳橋犯天津鴻章議築長圍制賊宗棠謂當且防且剿西岸固守必東路有追剿之師乃可掣其狂奔之勢上兩從其議於是勦王師大集宗棠駐軍吳橋捻徘徊陵邑濟陽合淮豫軍迭敗之總愚走河濱以死西捻平入覲天語褒嘉且詢西陲師期宗棠對以五年後卒如其言焉七年十月率師還陝抵西安時東北土寇董福祥等衆十餘萬擾延安綏德西南陝回白彥虎等號二十萬踞甘肅董志原松山至破土寇降福祥而回益四出勦掠其西南竄出者並力擾秦川黃鼎破之宗棠進軍乾州謀報回巢將徙金積堡分軍擊之遂下董志原連復鎮原慶陽回死者至三萬督丁壯耕作教以區田代田法擇嶮荒地發帑金巨萬悉取所收饑民及降衆十七萬居焉遂以八年五月進駐涇州甘回最著者西曰馬朵三踞西寧南曰馬占鰲距河州北曰馬化隆踞甯夏靈州化隆以金積堡爲老巢堡當秦漢兩渠間扼黃河之險擅鹽馬茶大利環堡五百餘寨黨衆嘯聚掠取漢民產業子女陝回時時與通市相爲首尾化隆以新教煽回民購馬造軍械而陽輸誠給糧圖善董

志原既平陝回竄靈州化隆上書爲陝回乞撫宗棠察其詐備三月糧先攻金積堡以爲收功全隴之基及松山追陝回至靈州扼永靈洞化隆懼仍代陝回乞撫謀緩兵穆圖善信之日言撫綏遠城將軍至劾松山濫殺激變然化隆實無意降也密召諸回並出劫軍餉十一月宗棠進駐平涼九年松山陣歿以其兄子錦棠代之戰屢捷而中路南路軍亦所向有功陝回受撫者數千人及奪秦壩關化隆益窘詣軍門乞降誅之夷其城堡還甘回固原平涼陝回化平而編管鈴束之甯靈悉定奏言進規河湟而是時有伊犁之變詔宗棠分兵屯肅州乃遣徐占彪將六千人往十年七月自率大軍由平涼移駐靜寧八月至安定寇聚河州其東山必繞洮河三甲集集西太子寺再西大東鄉皆險要諸將分擊悉破平之時回酋朵三已死占鰲見官軍深入西甯回已歸順去路絕遂亦受撫河州平十一年七月移駐蘭州占彪前以伊犁之變率師而西也於時肅州阻亂回酋馬文祿先已就撫聞關外兵事急復據城叛及占彪軍至乃嬰城固守而乞援西甯陝回白彥虎禹得彥亦潛應文祿會錦棠率軍至西甯土

回及陝回俱變推馬本源爲元帥西甯東北阻湟水兩山對峙古所稱湟中也賊據險而屯俄敗走遺棄馬騾滿山谷竄巴燕戎格大通都司馬壽復嶠向陽堡回殺漢民以叛十二年正月錦棠攻向陽堡奪門入斬馬壽遂破大通擄燕巴戎格誅本源河東西諸回堡皆降文祿踞肅州詭詞求撫益招致邊外回助城守連攻未能下八月宗棠來視師文祿登城見帥旗奪氣請出關討賊自效不許金順錦棠軍大集文祿窮蹙出降磔之白彥虎竄遁關外肅州平以陝甘總督協辦大學士加一等輕車都尉奏請甘肅分闈鄉試設學政十三年晉東閣大學士留治所自咸豐初天下大亂粵盜最劇次者捻逆次者回宗棠旣手戡定之至是陝甘悉靖而塞外平回朝廷尤矜寵焉塞外回酋曰帕夏本安集延部和碩克伯也安集延故屬敖罕敖罕爲俄羅斯所滅安集延獨存帕夏畏俄逼闌入邊據喀什噶爾稍蠶食南八城又攻敗烏魯木齊所踞回安明安明者西甯回也初以新教游關外同治初乘陝甘漢回構變倡亂據烏城帕夏旣攻敗安明降之遂併有北路伊犁諸城收其賦入安明旋被逐走死而白彥

虎賁處烏城仍隸帕夏帕夏能屬役回衆通使結援英俄購兵械自備英人陰助之欲令別立爲國用捍蔽俄當是時俄以回數擾其邊境遽引兵逐回取伊犁且言將代取烏魯木齊光緒元年宗棠既平關隴將出關而海防議起論者多言自高宗定新疆歲糜數百萬此漏卮也今至竭天下力贍西軍無以待不虞尤失計宜徇英人議許帕夏自立爲國稱藩罷西征專力海防鴻章言之尤力宗棠曰關隴新平不及時規還國家舊所沒地而割棄使別爲國此坐自遺患萬一帕夏不能有不西爲英併即北折而入俄耳吾地坐縮邊要盡失防邊兵不可減糜餉自若無益海防而挫國威且長亂此必不可軍機大臣文祥獨善宗棠議遂決策出塞不能兵授宗棠欽差大臣督軍事金順副之二年三月次肅州五月錦棠北逾天山會金順軍先攻烏魯木齊克之白彥虎遁走托克遜九月克瑪納斯南城北路平乃規南路令曰回部爲安曾驅迫厭亂久矣大軍所至勿淫掠勿殘殺王者之師如時雨此其時也三年三月錦棠攻克達坂城悉釋所禽繼回縱之歸南路恂懼翼日收托克遜城而占彪及孫金彪兩軍

亦連破諸城隘合羅長祜等軍收吐魯番降繼回萬餘帕夏飲藥死其子伯克胡里戕其弟走喀什噶爾白彥虎走開都河宗棠欲遂禽之奏未上適庫倫大臣上言西事宜畫定疆界而廷臣亦謂西征費鉅今烏城吐魯番既得可休兵宗棠歎曰今時有可乘乃爲畫地縮守之策乎抗疏爭之上以爲然時俄方與土耳其戰金順請乘虛襲伊犁宗棠曰不可師不以正彼有辭矣八月錦棠會師曲會遂由大道向開都河爲正兵余虎恩等奇兵出庫爾白彥虎走庫車趨阿克蘇錦棠遮擊之轉遁喀什噶爾大軍還定烏什遂收南疆東四城何步雲以喀什漢城降伯克胡里既納白彥虎乃并力攻漢城大軍至復遁走俄西四城相繼下宗棠露布以聞詔晉二等侯布魯特十四部爭內附十四年正月條上新疆建行省事宜并請與俄議還伊犁交叛人二事詔遣全權大臣崇厚使俄俄以通商分界償款三端相要崇厚遽定約爲朝士所糾議久不決宗棠奏曰自俄踞伊犁蠶食不已新疆乃有日蹙百里之勢俄視伊犁爲外府及我索地則索償盧布五百萬元是俄還伊犁於俄無損我得伊犁僅一荒郊今崇厚

又議界俄陬爾果斯河及帖爾斯河是劃伊犁西南之地歸俄也武事不競之秋有割地求和者矣茲一矢未加遽捐要地此界務之不可許者也俄商志在貿易其政府即廣設領事欲藉通商深入腹地此商務之不可許者也臣維俄人包藏禍心妄付吾國或厭用兵遂以全權之使臣牽制疆臣爲今之計當先之以議論委婉而用機次決之以戰陳堅忍而求勝臣雖衰慵無似敢不勉旃上壯其言嘉許之崇厚得罪去命曾紀澤使俄更前約於是宗棠乃自請出屯哈密規復伊犁以金順出精河爲東路張曜沿特克斯河爲中路錦棠經布魯特游牧爲西路而分遣譚上連等分屯喀什噶爾阿克蘇哈密爲後路聲援合馬步卒四萬餘人六年四月宗棠與樞發肅州五月抵哈密俄聞王師大出增兵守伊犁納林河別以兵船翔海上川震撼京師同時天津奉天山東皆警七月詔宗棠入都備顧問以錦棠代之而俄亦懾我兵威恐事遂決裂明年正月和議成交還伊犁防海軍皆罷宗棠用兵善審機不常其方略籌西事尤以節兵裕餉爲本謀始西征慮各行省協助餉不時至請一借貸外國沈葆楨尼其

議詔曰宗棠以西事自任國家何惜千萬金爲撥款五百萬敕自借外國債五百萬出塞凡二十月而新疆南北城盡復者饋餉饒給之力也初議西事主興屯田聞者迂之及觀宗棠奏論關內外舊屯之弊以謂挂名兵籍不得更事農宜盡兵農爲二簡精壯爲兵散愚弱使屯墾然後人服其老謀旣入覲賜紫禁城騎馬使內侍二人扶掖上殿授軍機大臣兼值譯署國家承平久武備弛不振而海外諸國爭言富強雖中國屢平大難彼猶私議以爲脆弱也及宗棠平帕夏外國乃稍稍傳說之其初入京師內城有教堂高樓俯瞰宮殿民間謠言左侯至樓即燬矣爲示諭曉乃止其威望在人如此然值軍機譯署同列頗厭苦之宗棠亦自不樂居內引疾乞退九月出爲兩江總督南洋通商大臣嘗出巡吳淞過上海西人爲建龍旗聲礮迎導之維謹九年法人攻越南自請赴滇督師檄故吏王德榜募軍永州號恪靖定邊軍法旋議和止其行十年滇越邊軍潰召入都再直軍機法大舉內犯詔宗棠視師福建檄王鑑子詩正潛軍渡臺灣號恪靖援臺軍詩正至臺南爲法兵所阻而德榜會諸軍大捷於諒山和

議成再引疾乞退七月卒於福州年七十三贈太傅諡文襄祀京師昭忠祠賢良祠並建專祠於湖南及立功諸省宗棠爲人多智略內行甚篤剛峻自天性穆宗嘗戒其褊衷始未出與國藩林翼交氣陵二人出其上中興諸將帥大率國藩所薦起雖貴皆尊事國藩宗棠獨與抗行不少屈趣舍時合時不合國藩以學問自歛抑議外交常持和節宗棠鋒穎廉頗向敵矣士論以此益附之然好自矜伐故出其門者成德達材不及國藩之盛云子四人孝威舉人以廕爲主事先卒旌表孝行孝寬郎中孝勛兵部主事孝同江蘇提法使孫念謙襲侯爵通政司副使

論曰宗棠事功著矣其志行忠介亦有過人廉不言貧動不言勞待將士以誠信相感善於治民每克一地招徠撫綏衆至如歸論者謂宗棠有霸才而治民則以王道行之信哉宗棠初出治軍胡林翼爲書告湖南曰左公不顧家請歲籌三百六十金以贍其私曾國藩見其所居幕廨小爲別製二幕貽之其廉儉若此初與國藩論事不洽及聞其薨乃曰謀國之忠知人之明自媿不如志益

遠矣

清史稿

列傳二百

曾國荃

沈葆楨

劉坤一

曾國荃字沅甫湖南湘鄉人大學士國藩之弟也少負奇氣從國藩受學京師成豐二年舉優貢六年粵匪石達開犯江西國藩兵不利國荃欲赴兄急與新授吉安知府黃冕議請於湖南巡撫駱秉章使募勇三千人別以周鳳山一軍合六千人同授江西十一月克安福連破賊於大汾河千金坡進攻吉安下旁數縣七年春丁父憂回籍夏賊腦聚吉安周鳳山軍敗潰時王鑫劉騰鴻皆喪亡士氣衰沮江西巡撫耆齡奏起國荃統吉安諸軍軍復振冬敗石達開於三曲灘吉安圍始合八年春克吉水萬安八月督水師毀白鷺洲賊船破城外堅壘遂克吉安禽賊首李雅鳳以功累擢知府撤軍還長沙九年復赴江西率朱品隆等軍五千餘人援剿景德鎮時諸軍與賊相持數月莫肯先進國荃至乃合力敗援賊於浮梁南三戰皆捷火鎮市追殲賊及半克浮梁擢道員江西肅

清國藩出九江至黃州與胡林翼議分路圖皖國荃留軍巴河自還湖南增募
爲萬人多隆阿鮑超等既大破賊於太湖潛山十年閏三月國荃乃進軍集賢
關規攻安慶陳玉成來援擊走之十一年陳玉成復糾捻衆至於菱湖兩岸築
堅壘與城賊更番來犯國荃調水師入湖令弟貞幹築壘湖東以禦之會陳玉
成在桐城爲多隆阿所敗還趨集賢關迎擊破之玉成由馬踏石遁走仍留黨
踞赤岡嶺與菱湖賊壘犄角國荃困以長濠鮑超來合攻悉破其壘禽斬萬餘
進破安慶城外賊營燬東門月城惟北門三石壘堅不可下令降將程學啟選
死士緣礮穴入拔之陳玉成屢爲多隆阿所創收餘衆糾合捻匪復屯集賢關
嬰官軍後路城賊葉芸來亦傾巢出撲國荃憑濠而戰屢擊卻仍復進增築新
壘遣貞幹合水師扼菱湖絕賊糧路八月以地雷轟城克之殲賊萬餘俘數千
捷聞以按察使記名加布政使銜賜黃馬褂尋以追殄餘賊賜號偉勇巴圖魯
於是國藩進駐安慶國荃率師東下規江甯克無爲州破運漕鎮拔東關加頭
品頂戴分兵守諸隘自回湖南增募勇營同治元年授浙江按察使遷江蘇布

政使詔以軍務緊要毋庸與兄國藩迴避同省三月率新募六千人至軍自循江北岸令弟貞幹循南岸彭玉榮等率水師同進拔銅城牯雍家鎮諸隘復巢縣含山和州克裕溪口西梁山渡江會攻金柱關乘間襲太平克之回克金柱關貞幹亦克蕪湖令彭毓橘截敗賊於薛鎮渡口大破之五月連奪秣陵關大勝關要隘水師進扼江甯護城河口陸師巡抵城南雨花臺駐屯賊來爭皆擊卻之國藩猶以孤軍深入爲慮國荃謂舍老巢勿攻浪戰無益逼城足以致敵雖危事有可爲會秋疫大作士卒病者半賊酋李秀成自蘇州糾衆數十萬來援結二百餘壘國荃於要隘增壘輔以水師先固糧道賊環攻六晝夜彭毓橘等乘其乏出擊破賊營四賊悉向東路填濠而進前仆後繼國荃督軍抵禦礮傷頗裹創力戰賊始退李世賢又自浙江率十萬衆至與秀成合攻屢掘地道來襲燬營壘百計攻襲皆未得逞蕪湖守將王可陞率援師至國荃簡精銳分出焚賊數壘餘衆走進擊大破之先後殲賊數萬圍乃解秀成世賢引去是役以病餘之卒苦戰四十餘日卒保危局詔嘉獎頒珍寶議者欲令乘勝退保

蕪湖國荃以賊雖衆烏合不足畏不肯退二年春國藩親至視師見圍屯堅定始決止退軍之議詔擢浙江巡撫仍統前敵之軍規取江甯四月攻雨花臺及衆寶門外石壘克之九洲洲爲江甯犄角賊衆守最堅國荃偕彭玉慶楊岳斌往覘形勢合水陸軍血戰克之江面遂清連克上方橋江東橋近城之中和橋雙橋門七甕橋稍遠之方山土山上方門高橋門秣陵關博望城諸賊壘以次並下國荃初至合各路兵僅二萬至是募團師至五萬人十月分軍扼孝陵衛李鴻章克蘇州李秀成率敗衆分布丹陽句容自入江甯勸洪秀全同走不聽遂留同城守三年春克鍾山天保城城圍始合賊糧匱城中種麥濟饑國荃迭令掘地道數十處賊築月圍以拒士卒多傷亡會詔李鴻章移師會攻諸將以城計日可破恥借力於人攻益力鴻章亦不至國荃慮師老生變督李臣典等當賊礮密處開地道既成懸重賞募死士李臣典朱洪章伍維壽武明良譚國泰劉連捷沈鴻寶張詩日羅雨春皆先登者九人六月十六日日加午地道火發城崩二十餘丈李臣典朱洪章等蟻附爭登賊傾火藥轟燒彭毓楠蕭孚泗

手刃退卒數人遂擁入朱洪章沈鴻賓羅兩春攻中路向僞天王府劉連捷張
詩日譚國泰攻右路趨神策門朱南桂等梯城入合取儀鳳門其左路彭毓橘
由內城至通濟門蕭孚泗等奪朝陽洪武門羅達元等從聚寶門入李金洲從
通濟門入陳提易良虎從旱西水西門入於是江甯九門皆破守陣賊誅殺殆
盡猶保子城夜半自縱火焚僞王府突圍走要截斬數百人追及湖熟俘斬亦
數百洪秀全已前一月死獲其屍於僞宮其子洪福瑱年十五六訛言已自焚
死餘黨挾之走廣德國荃令閉城救火搜殺餘賊獲秀全兄洪仁達及李秀成
伏誅凡僞王主將大小酋目三千餘皆死亂兵斃賊十餘萬拔難民數十萬捷
聞詔嘉國荃堅忍成功加太子少保封一等伯爵錫名威毅賜雙眼花翎國荃
功高多謗初奏洪福瑱已斃既而奔竄浙江江西仍爲諸賊所擁言者以爲口
實遂引疾求退遣撤部下諸軍溫詔慰留再疏始允開缺回籍四年起授山西
巡撫辭不就調湖北巡撫命幫辦軍務調舊部剿捻匪五年抵任汰湖北冗軍
增湘軍六千以彭毓橘郭松林分統之時捻匪往來鄂豫之交國荃檄鮑超由

張陽趨浙川內鄉防西路郭松林由桐柏唐縣出東路劉維楨向新野爲聲援賊折而北竄詔郭松林越境會剿是年冬敗賊於信陽孝感賊竄雲夢應城德安郭松林擊走之克應城雲夢又敗之皂河楊澤松林追賊白口中伏受重傷其弟芳鈐戰死彭毓橘破賊於沙口又敗之安陸國荃以賊多騎難與追逐欲困之山地毓橘偕劉維楨屢戰不能大創賊竄去總督官文與不協國荃疏劾其貪庸驕蹇詔解官文總督任六年春賊復犯德安爲劉銘傳鮑超所敗遁入河南境尋復回竄彭毓橘恃勇輕進遇賊蘄州戰歿於六神港五月捻匪長驅經河南擾及山東詔斥諸疆吏防剿日久無功國荃摘頂下部議處尋以病請開缺允之光緒九年授陝西巡撫邊河東河道總督二年復調山西巡撫比年大旱災連數省國荃力行賑卹官帑之外告貸諸行省勸捐協濟分別災情輕重賑期久暫先後賑銀一千三百萬兩米二百萬石活饑民六百萬善後蠲徭役歲省民錢鉅萬同時荒政山西爲各省之冠民德之爲立生祠六年以疾乞罷慰留尋召來京七年授陝甘總督命赴山海關治防復乞病歸八年署兩

廣總督九年內召十年署禮部尙書調署兩江總督兼通商大臣尋實授時法
蘭西兵犯沿海中朝和戰兩議相持國荃修江海防務知上海關繫諸國商務
法兵不能驟至取以鎮靜詔遣文臣分赴海疆會辦福建疆吏遂不能主兵國
荃言權不可分朝廷亦以其老於軍事專倚之命遣兵輪援臺灣原議五寶遣
其三坐下部議革職留任兵輪終不得達其二折至浙洋助戰鎮海有功和議
尋定十一年京察以國荃夙著勳勳開復處分十五年皇太后歸政推恩加太
子太保國荃治兩江凡六年總攬宏綱不苟細故軍民相安十六年卒於官贈
太傅賜金治喪命江甯將軍致祭特設忠襄入祀昭忠祠賢良祠建專祠孫廣
漢襲伯爵官至左副都御史國荃弟貞幹原名國葆諸生從兄國藩剿平常德
甯鄉土匪時楊岳斌爲把總彭玉慶爲諸生貞幹亟稱於國藩謂二人英毅非
常同辟領水師初敗於岳州貞幹自引咎言諸將無罪國藩東征貞幹家居未
從及其兄國華戰歿三河貞幹督殺賊復仇胡林翼使領千人自黃州轉戰潛
山太湖從國荃攻安慶設計招降賊將程學啟克城之功學啟爲多同治元年

與鳳荃分路沿江進師破魯港克繁昌南陵蕪湖會軍雨花臺尋染疫將假歸援賊至被圍強起任戰守圍解而病劇卒於軍初以功敘訓導加國子監學正銜賜號迅勇巴圖魯既破援賊權知府命下而貞幹已歿事聞贈按察使李鴻章爲陳戰績詔依二品議卹贈內閣學士予騎都尉世職建專祠設靖毅

沈葆楨字幼丹福建侯官人道光二十七年進士選庶吉士授編修遷御史數上疏論兵事爲文宗所知咸豐五年出爲江西九江知府九江已陷賊從曾國藩莞營務六年署廣信府賊曾楊輔清連陷貴溪弋陽將逼廣信葆楨方赴河口籌餉聞警馳回郡官吏軍民多避走妻林先刺血書乞援於浙軍總兵饒廷選會大雨賊滯興安廷選先入城賊至七戰皆捷解圍去曾國藩上其城守狀詔嘉獎以道員用七年擢廣饒九南道留莞廣信防務數假客軍擊走竄賊平弋陽土匪誅安仁抗糧奸民加按察使銜以伉直忤大吏乞養親去官十年起授吉贛南道以親老辭未出命留原籍治團練曾國藩屢薦其才十一年詔赴安慶大營委用未幾超擢江西巡撫諭曰朕久聞沈葆楨德望冠時才堪應變

以其家有老親擇江西近省授以福寄便其迎養且爲曾經仕宦之區將來樹建殊勳光榮門戶足承親歡如此體恤如此委任諒不再以養視瀆請葆楨奉詔感泣赴官時浙江淪陷左宗棠由江西進軍規復賊酋楊輔清李世賢合擾江西翼斷皖浙饒道同治元年葆楨親赴廣信籌防令士民築堡自衛堅壁清野倚用湘將王德榜段起及席寶田江忠義諸人客軍並聽指揮賊至輒擊退二年破黃文金於小路口又破之於祁門會浙軍克黟縣賊由太平石埭建德擾江西督軍進擊走之是年秋因病請假初曾國藩軍餉多倚江西葆楨以本省軍事方殷奏留自給江甯前敵需餉亟而江西協解不至國藩疏爭御史華祝三亦疏言兩人齟齬慮誤大局詔兩解之命各分其半別以江海關撥欸濟江南軍三年大軍圍江甯急賊聚擾江西圖牽後路詔楊岳斌移師督剿命葆楨會商機宜既而江甯杭州相繼復黃文金擁洪福瑱由浙皖竄江西爲入粵計葆楨令席寶田追剿至石城大破之陣禽洪仁玕洪仁政黃文英等搜獲洪福瑱於荒谷中皆伏誅以禽首逆功予一等輕車都尉世職加頭品頂戴葆楨

推功諸將疏辭詔嘉其開誠布公將士用命且江西吏治民風日有起色宜膺殊賞不允所請尋乞歸養溫詔慰留四年以親病請假省視因防務急未行丁母憂命治喪百日假滿仍回任堅請終制乃允之六年命爲總理船政大臣初左宗棠創議於福州馬尾山麓瀕江設船廠未及興工宗棠調陝甘疏言非葆楨莫能任葆楨釋服始出任事造船塢及機器諸廠聘洋員日意格德克碑爲監督月由海關撥經費五萬兩期以五年告成附設藝童學堂預募水勇習練駕駛事皆創立船材來自外國煤炭亦購諸南洋採辦尤易侵漁葆楨堅明約束一無瞻徇布政使用開錫爲提調延平知府李慶霖佐局事皆爲總督所不喜歸欒欲去之葆楨疏爭得留藩署吏玩抗以軍法斬之衆咸驚服九年丁父憂仍請終制暫解事服闋始出當其居憂內閣學士宋晉疏請暫停船工詔下酌議葆楨上疏略謂自強之道與好大喜功不同不可以浮言搖動且洋員合同不能廢機廠經營不可棄不特不能即時裁撤五年期滿亦不可停推論利害切至詔嘉納之十一年再莅事先後造成兵艦二十艘分布各海口尋以匠

徒藝成議酌改船式督令自造不用洋員監督疏陳善後事宜並如議行十三年日本因商船避風泊臺灣又爲生番所戕藉詞調兵覬覦番社地詔葆楨巡視兼辦各國通商事務日兵已登岸結營葆楨據理詰之曉諭番族遵約束修城築壘爲戰備提督唐定奎亦率淮軍至日人如約撤兵乃議善後事宜疏陳福建巡撫宜移駐臺灣吏治軍政方能整頓詔如所請甫內渡獅頭社番戕官滋事光緒元年復往督唐定奎等伐山開道攻破內外獅頭等社燬其巢脅從者次第就撫中路北路亦分軍深入諸番皆聽約束先於琅玕增設恒春縣至是奏設臺北府淡水新竹宜蘭三縣隸之噶瑪蘭通判移駐雞籠山臺灣府同知移駐卑南鹿港同知移駐水沙連疏陳營伍積弊請歸巡撫節制購機器開臺北煤鑛爲明遺臣鄭成功請予設建祠以作臺民忠義之氣並報可遂撤軍內渡事竣擢兩江總督兼通商大臣江南自軍事定後已踰十年疆吏習爲寬大葆楨精覈吏事治尙嚴肅屬吏懷懷奉職宿將驕蹇者繩以法不稍假借尤嚴治盜莅任三月誅戮近百人莠民屏迹皖南教案華教士誣良民重罪親訊

得其受枉狀反坐教士立誅之然後奏聞洋人亦屈伏淮南引地以次歸復浚
河積穀捕蝗禁種罌粟諸政並實力施行數以病乞退五年入覲皇太后溫諭
勉以共濟時艱毋萌退志自此遂不言病是年十一月卒於位贈太子太保祀
賢良祠立功各省建專祠設文廟子瑋慶賜舉人襲一等輕車都尉世職諭慶
恩廕主事官至貴州巡撫

劉坤一字峴莊湖南新寧人廩生成豐五年領團練從官軍克茶陵郴州桂陽
宜章敘功以教諭即選六年駱秉章遣劉長佑率師援江西坤一爲長佑族叔
而年少師事之從軍中自領一營長佑既克萍鄉令進戰蘆溪宣風鎮連破賊
逼袁州招降賊目李能通於是降者相繼守城賊何益發夜啓西門坤一先入
復袁州累擢直隸州知州賜花翎七年克臨江擢知府八年長佑以病歸坤一
代將其軍偕蕭啓江渡贛江規撫州克崇仁啓江在上頓渡爲賊所困往援大
破賊遂復撫州連克建昌擢道員九年石達開犯湖南坤一回援解永州新寧
之圍加鹽運使銜賊竄廣西從劉長佑追躡復柳州長佑擢撫廣西令坤一駐

柳州清餘匪悉平之加布政使銜進攻潯州十一年七月拔其城以按察使記名石達開回趨川楚坤一扼之融縣掩擊敗之賊潰走入黔授廣東按察使同治元年遷廣西布政使劉長佑赴兩廣總督任命坤一接統其軍赴潯州進剿貴縣匪首黃鼎鳳在諸匪中最狡悍屢議剿撫不能下二年坤一破之於登龍橋遂駐守之鼎鳳老巢曰平天寨倚山險樹重柵守以巨礮罩墟相距十餘里爲犄角坤一陽議撫撤軍回貴縣潛師夜襲罩墟遂圍平天寨復橫州鼎鳳勢蹙三年四月禽鼎鳳及其黨誅之潯州平賜號碩勇巴圖魯四年剿平思恩南甯土匪復永淳擢江西巡撫令席寶田黃少春會剿粵匪餘黨於閩邊五年聚殲於廣東嘉應州加頭品頂戴軍事既定坤一治尙安靜因整頓丁漕不便於紳戶十一年左都御史胡家玉疏劾之坤一奏家玉積欠漕糧又屢貽書干預地方事詔兩斥之家玉獲譴坤一亦坐先不上聞部議降三級調用加恩改革職留任降三品頂戴尋復之命署兩江總督光緒元年擢兩廣總督廣東號爲富穡庫儲實空出入不能相抵議者請加鹽釐及洋藥稅坤一以加鹽釐則官

引愈滯但嚴緝私販以暢銷路又援成案籌款收買餘鹽發商交運官民交便藥釐抽收各地輕重不同改歸一律無加稅之名歲增鉅萬吏治重在久任令實缺各歸本任不輕更調禁賭以絕盜源水陸緝捕各營分定地段以專責成盜發輒獲二年調授兩江總督六年俄羅斯以交還伊犁藉端要挾詔籌防務坤一上疏略謂東三省無久經戰陣之宿將勁旅急宜綢繆西北旣戒嚴東南不可復生波折日本琉球之事宜早結束勿使與俄人合以謀我英德諸國與俄猜忌日深應如何結爲聲援以伺俄人之後凡此皆賴廟謨廣運神而明之九年法越構釁邊事戒嚴坤一疏請由廣東廣西邊派明幹大員統勁旅出關駐紮諒山等處以助剿土匪爲名密與越南共籌防禦並令越南招太原宣光黑旗賊衆免爲法人誘用雲南據險設奇以資犄角法人知我有備其謀自沮雲南方擬加重越南貨稅決不可行重稅能施之越人不能施之法人越人倘因此轉嗾法人入滇通商得以依託假冒如沿海奸商故智不可不慮越南如果與法別立新約中國縱不能禁亦應使其慎重或即指示機宜免致再誤越

南積弱若不早爲扶持覆亡立待滇粵藩籬盡失逼處堪虞與其補救於後曷若慎防於先此不可不明目張膽以提挈者也疏入多被採納十二年丁繼母憂十六年仍授兩江總督十七年命幫辦海軍事務二十年皇太后萬壽賜雙眼花翎日本犯遼東九連城鳳凰城金州旅順悉陷北洋海陸軍皆失利召坤一至京命爲欽差大臣督關內外防剿諸軍坤一謂兵未集械未備不能輕試詔促之出關時已遣使議和坤一以兩宮意見未洽爲憂瀕行語師傅翁同龢曰公調和之責比余軍事爲重也二十一年春前敵宋慶吳大澂等復屢敗新募諸軍實不能任戰日本議和要挾彌甚下坤一與直隸總督王文韶決和戰之策坤一以身任軍事仍主戰而不堅執未幾和議成回任坤一素多病臥治江南事持大體言者論其左右用事詔誠其不可偏信振刷精神以任艱鉅坤一屢疏陳情乞退不許二十五年立溥儀爲穆宗嗣子朝野洶洶謂將有廢立事坤一致書大學士榮祿曰君臣之分久定中外之口宜防坤一所以報國在此所以報公亦在此二十六年值德宗萬壽加太子太保拳匪亂起坤一偕李

鴻章張之洞創議會東南疆吏與各國領事訂約互爲保護人心始定車駕西幸議者或請遷都西安坤一復偕各督撫力陳其不可顛請回鑾二十七年偕張之洞會議請變法以興學爲首務中法之應整頓變通者十二事西法之應兼采並用者十一事聯銜分三疏上之詔下政務處議行是爲實行變法之始洎回鑾施恩疆吏加太子太保二十八年卒優詔賜卹嘉其秉性公忠才猷宏遠保障東南厥功尤著追封一等男爵贈太傅賜金治喪命江甯將軍致祭特設忠誠祀賢良祠原籍立功省建專祠賜其子能紀四品京堂諸孫並予官張之洞疏陳坤一居官廉靜寬厚不求赫赫之名而身際艱危維持大局毅然擔當從不推諉其忠定明決能斷大事有古名臣風世以所言爲允

論曰曾國荃當蘇浙未復孤軍直擣金陵在兵事爲危機其成功由於堅忍鏖其本根則枝蔓自絕信不世之助也屢退復起朝廷倚爲保障以功名終沈葆楨清望冠時力任艱鉅兵略吏治並卓然其手創船政精果一時無耦後來不能充拓且聽廢棄豈非因任事之難其人哉劉坤一起家軍旅謀國獨見其大

晚年助望幾軼同儕房杜謀斷之功不與褒鄂並論矣

清史稿

列傳二百一

李臣典

蕭孚泗

朱洪章

劉連捷

彭毓橘

張詩日

字伍廉 湖南 未兩枝 吳家元

李臣典字祥雲湖南邵陽人年十八從軍初隸王鑫部下後從曾國荃援江西隸吉字營咸豐八年戰吉安南門外國荃受重創臣典大呼挺矛進追殺至永豐新淦國荃奇其勇超擢寶慶營守備克景德鎮復浮梁皆爲軍鋒十年從戰小池驛晉都司賜花翎進規安慶戰菱湖逼賊屯阮其北國荃傷股墜馬臣典馳救以歸偕張勝祿張詩日戰樅陽破援賊水師得以進屯十一年攻安慶西門賊壘陳玉成糾楊輔清數萬人圍官軍數重戰至日中未決馳告諸將曰事急矣成敗在此舉臣典橫槊前驅與諸營合力決盪賊大奔斬首數千級遂拔安慶擢參將賜號剛勇巴圖魯同治元年從國荃乘勝下沿江各城隘進軍江甯臣典會取丹陽鎮奪秣陵關以總兵記名軍中疫作李秀成大舉來援逼壘

慶戰國荃督陣礮傷頰臣典與副將倪桂節力衛之桂節陣亡賊方攻西路急臣典曰此虛聲也請備東路既而賊果萃東路參將劉玉春死之礮彈穿壁牆如雨注臣典死守卒不能入圍解加提督銜二年偕趙三元夜襲兩花臺石城束草填壕緣梯將上賊驚覺然礮轟擊軍少卻臣典率旗大呼躍而上諸軍繼之擲火彈毀敵樓城立拔以提督記名尋授河南歸德鎮總兵偕蕭孚泗張詩日等攻奪紫金山又敗諸校場連克近城諸壘三年克天保城江甯之圍始合五月克地保城六月諸軍番休進攻賊死拒殺傷相當臣典偵知賊糧未盡諸軍苦戰力漸疲謂國荃曰師老矣不急克日久且生變請於龍膊子重掘地道願獨任之遂率副將吳宗國等日夜穴城十五日地道成臣典與九將同列誓狀翼日地雷發臣典等蟻附入城諸軍畢入下令見長髮者新薙髮者皆殺於是殺賊十餘萬人臣典遽病恃壯不休息未幾卒於軍年二十七捷上列臣典功第一錫封一等子爵賜黃馬褂雙眼花翎命未至而臣典已歿詔加贈太子少保諡忠壯吉安安慶江甯各建專祠

蕭孚泗湖南湘鄉人咸豐三年入湘軍從羅澤南轉戰江西湖北洊擢守備六年從曾國荃援江西克安福吉水萬安諸縣七年克峽江擢游擊賜花翎八年從攻吉安賊出撲孚泗營開壁營擊斃悍賊多名旋克吉安擢參將九年江西肅清擢副將會攻太湖十年春大戰小池驛復太湖孚泗功多賜號勳勇巴圖魯進攻安慶戰菱湖孚泗於東路橫潦倚水築新營會擊屢破賊分道攻安慶城外諸壘賊援迭至與城賊相應更番撲官軍營壘孚泗等且戰且築壘賊不得逞又偕水師副將蔡國祥截獲賊糧八月以地雷壞城復安慶以總兵記名加提督銜授河南歸德鎮總兵同治元年國荃循江東下孚泗爲前鋒攻拔西梁山會水師克太平蕪湖破金柱關東梁山進克秣陵關江心洲乘勝逼江甯以提督記名李秀成來援分黨趨江心洲截運道孚泗等逆擊敗之賊攻孚泗後營礮臺相持十餘日賊以地雷毀營牆孚泗以火藥數十桶擲轟賊不得入伺賊疲孚泗與彭毓橘突出夾擊踏平賊壘數十賜黃馬褂二年偕總兵李臣典襲克兩花壘石城追至上方橋斬賊數千又破秣陵關賊卡夜襲上方橋結

夜渡河扼雙橋門連破賊隘偕彭毓橘縱火焚其橋燬賊屯擢福建陸軍提督
三年既克天保城孚泗出鍾山北於太平門築三壘守之絕賊糧道六月進占
龍膊子山石城孚泗與李臣典築礮臺山上距城僅十餘丈積沙草高與城齊
作偽攻狀潛於其下鑿地道賊宵攻毀礮臺副將陳萬勝戰死明日會師逼城
下總兵郭鵬程王紹義復中礮死及地道成火發城圯將士爭登賊擲火藥抵
拒死仆相繼孚泗手刃退者數人士氣乃奮盡從缺口入李秀成匿民舍孚泗
索獲之並禽洪仁達論功賜封一等男爵賜雙眼花翎尋丁父憂歸光緒十年
卒於家優卹諡壯肅

朱洪章字煥之貴州黎平人咸豐初應募爲鄉勇從黎平知府胡林翼剿新甯
竄匪又剿黃平榔匪禽匪首劉瞎麼以功獎外委四年從林翼援湖北會克岳
州從塔齊布攻武昌破賊洪山遂隸塔齊布軍戰大冶半壁山田家嶺孔龍小
池口攻九江無役不從以勇名塔齊布卒從周鳳山鳳山敗隸畢金科六年克
饒州擢千總金科戰歿代領其軍江西不給餉張芾倚蔽皖南資之軍始不散

又以會攻四十里街他將敗績被劾降把總九年從曾國荃復景德鎮復官以守備補用遂從曾國荃部下戰績始著十年從攻太湖解小池驛之圍晉都司進攻安慶爭濠奪壘斬刈甚多十一年克安慶超擢參將賜號勳勇巴圖魯從國荃由皖東下連奪沿江要隘擢副將進屯兩花臺江南城賊出撲屢擊破之及援賊至大營被圍迭以地雷毀營牆悍賊擁入口銜利刃匍匐而進洪章督隊發槍礮擲火焚燒斃賊無算傷亡士卒甚多久之始解洪章先以迭克城隘以總兵記名至是加提督銜同治三年攻江甯久不拔及開地道於龍膊子山麓告成議推前鋒國荃召諸將署名具軍令狀洪章署第一武明良第二劉連捷第三其他以次署畢共得九人發火城崩洪章率所部長勝煥字三營千五百人從倒口首先衝入賊倉猝從城頭擲火藥傾盆下士卒死四百餘人洪章入城後結圓陣與賊排擊諸將畢入乃分軍爲三洪章趨中路直攻天府之北短兵巷戰一日夜搜斬逆酋尤衆賜黃馬褂子騎都尉世職無論提鎮缺出僅先題奏初敘入城功李臣典以決策居第一洪章列第三衆爲不平洪章曰

吾一介武夫由行伍擢至總鎮今幸東南底定百戰餘生荷天寵錫已叨非分又何求焉四年授湖南永州鎮總兵光緒二年調雲南鶴麗鎮署昭通臨安際越諸鎮鶴麗地卑下水潦常沒民田有新河洩水通塞無常洪章在鎮躬率士卒開濬數次水患爲紓民感之十四年因病乞開缺病痊曾國荃調留兩江洪章懇弔龍膺子山祭死士瘞所國荃爲樹碑紀事十五年署狼山鎮總兵二十年張之洞檄募十營防金沙衛二十一年卒於軍之洞疏陳戰績稱其收復江甯功實第一詔宣付史館從優議卹設武愼附祀曾國藩國荃胡林翼專祠

劉連捷字南雲湖南湘鄉人以外委隸同族劉騰鴻湘後營轉戰湖北羅澤南薦諸巡撫胡林翼檄領副後營擢千總咸豐六年從騰鴻援江西戰瑞州騰鴻中礮殞連捷率所部攻城拔之爲曾國藩所重薦改文職以知縣留江西補用從曾國荃克吉安擢同知赴安徽助剿十年大捷於小池驛擢知府由集賢關攻安慶破援賊十一年復破援賊於集賢關克安慶擢道員賜號果勇巴圖魯同治元年攻巢縣東關賊立石牆於羅星山連捷率死士夜渡河縱火燒賊營

進克西梁山濡須口渡江克太平府金柱關蕪湖乘勝進軍江南連捷軍屯顏行李秀成李世賢糾大眾來攻以炸礮破營壁連捷築橫牆拒之常乘賊懈夜出破賊壘及賊退以按察使記名加布政使銜大營侍無爲州通餉道連捷率三千人往守營城外石洞阜二年李秀成困以長圍軍糧垂盡彭玉慶勸突圍出連捷誓死守彭毓橘來援合擊賊走之再復巢縣含山和州賜黃馬褂偕水師進攻九洑洲下關三年龍膊子山地道成偕諸軍衝入城江甯平以布政使記名加頭品頂戴子騎都尉世職湘軍凱撤曾國藩留連捷軍三千人駐守舒城桐城防捻匪會建營叛卒擾江西連捷督軍追剿駐防吉安贛州會剿粵匪餘黨於廣東嘉應州盡殲之連捷以傷病歸家居十載光緒中曾國荃撫山西奏起連捷練軍包頭從國荃移屯山海關又從至江南治江防十三年卒賜卹贈內閣學士建專祠諡勇介

彭毓橘字杏南湖南湘鄉人從曾國荃援江西積功敘縣丞及進安徽小池驛菱湖諸戰皆有功又屢破援賊累功擢知府會諸軍下沿江諸要隘渡江克太

平府金柱關蕪湖擢道員賜號毅勇巴圖魯大軍逼江南毓橘與諸將分路取
丹陽鎮秣陵關諸要隘夷賊壘數十進攻兩花臺石城賊死拒未下李秀成率
衆來援大營被圍毓橘方染疫力疾禦戰伺懈出擊破賊壘解圍後毓橘與劉
連捷援江北合水師連復江浦和州含山巢縣四城江北大定削平江南附近
諸賊壘毓橘功爲多龍膊子地道火發督軍衝入手刃退者論功最以布政使
記名予一等輕車都尉世職尋授福建汀漳龍兵備道未之任曾國荃疏調毓
橘統湘軍赴湖北擒匪竄擾黃州安陸毓橘進勦戰比有功同治六年師次蘄
水毓橘率小隊數百周覽地勢至麒麟凹賊大至被圍搏戰死傷略盡毓橘馬
陷泥淖被執罵賊被害事聞詔視布政使陣亡例議卹建專祠贈內閣學士諡
忠壯加騎都尉世職併爲三等男爵

張詩日湖南湘鄉人咸豐五年以外委隨羅澤南戰江西克義甯六年改隸曾
國荃軍克安福戰吉安八年復萬安吉水超擢守備九年以克吉安及景德鎮
浮梁累擢游擊十年援小池驛復太湖潛山曾參將從攻安慶率三營破援賊

於樅陽十一年克安慶擢副將加總兵銜賜號幹勇巴圖魯同治元年從克沿江要隘及抵江甯力守大營破援賊累擢以提督記名二年屢破江甯城外賊壘賜黃馬褂三年克天保地保兩城方開掘龍脖子地道李秀成夜自太平門突出來犯又詐爲官軍別從朝陽門東隅出偪營縱火詩曰偕諸將力戰卻之地道火發城崩詩曰率士卒登龍廣山奪太平門復循神策門轉戰至獅子山奪儀鳳門論功最予一等輕車都尉世職四年授直隸宣化鎮總兵五年從曾國藩勦捻破張總愚牛洛紅於西平又敗之萬金寨進攻雙廟賊巢賊以馬隊襲官軍後詩曰分軍回擊追敗之洪河又敗之鄆城召陵因傷發回籍六年卒曾國藩疏陳詩曰克復江甯當西北一路論功在李臣典劉連捷蕭孚泗之次優卹設勳武伍維壽湖南長沙人從曾國荃援江西攻安慶克沿江要隘擢副將奪雨花臺聚寶門外石壘累擢記名總兵賜號毅勇巴圖魯偕朱南桂破神策門入城率馬隊追逸賊至湖熟鎮禽斬賊酋李萬材等以提督記名賜黃馬褂予騎都尉世職六年授陝西漢中鎮總兵調甘肅寧夏鎮光緒元年卒朱南

桂湖南長沙人羅澤南舊部轉戰兩湖積功至副將賜號勛勇巴圖魯同治元年解金柱關圍二年克薛鎮博望鎮以總兵記名及克江甯南桂先破神策門月城梯而入賜黃馬褂予雲騎尉世職尋授河南歸德鎮總兵五年卒賜卹諡勳勇羅逢元湖南湘潭人由武生入伍從剿廣西曾國藩治水師充營官轉戰湖北江西累擢副將繼從曾國荃克安慶以總兵記名賜號展勇巴圖魯進克沿江要隘抵江甯還守太平屯金柱關賊酋陳坤書大舉來犯逢元堅守屢戰以少擊衆禽斬逾萬以提督記名及克江甯由南門舊陷口梯登賜黃馬褂予雲騎尉世職以傷發假歸光緒四年卒賜卹李祥和湖南湘鄉人初從羅澤南積功至游擊嗣從曾國荃克吉安復安慶累擢副將賜號著勇巴圖魯同治元年從大軍進江甯力守大營破援賊以提督記名三年攻克地保城先登築礮臺俯擊城中地道始成論功賜黃馬褂予雲騎尉世職四年授安徽壽春鎮總兵從劉松山赴陝西剿捻匪六年戰洛川大賢村中礮陣亡賜卹諡武壯肅慶衍湖南湘鄉人應募入湘軍右營轉戰江西湖北積功至副將克太湖潛山以

總兵記名賜號剛勇巴圖魯同治二年援江浦復含山巢縣和州加頭品頂戴
三年渡江會攻江甯克上方橋進鍾山築三壘太平門外城破於缺口衝入奪
朝陽洪武二門賜黃馬褂予雲騎尉世職吳宗國湖南長沙人以勇目從勦湖
北累擢守備同治元年從曾國荃沿江東下迭克要隘功多累擢參將賜號資
勇巴圖魯二年破衆寶門外上方橋江東橋各賊壘會水師破九洲印子山
賊巢擢副將從李臣典重開地道城賊防益嚴礮彈兩下宗國手簾牌持長繩
冒礮彈狙行而前抵城下測丈而返始興工開掘大功克成以提督記名予一
品封典五年偕提督郭松林剿捻德安戰羅家集中伏歿於陣依提督例賜卹
予騎都尉世職

論曰洪秀全踞江甯十有餘年曾國荃於蘇浙未定之先孤軍直擣城大援衆
事勢綦難及援賊既破因歐之鬪人人致死歷兩年之久竟成大功固由指揮
素定而在事諸將同心勦力奮不顧身其勇毅之烈紀太常而光繁閣無愧色
焉掇其尤者著於篇

清史稿

列傳二百二

黃翼升

字古山
興寧人

丁酉方

李成謀

李朝斌

江陰人

劉培元

黃翼升字昌岐湖南長沙人少孤育於鄧氏冒其姓入長沙協標充隊長咸豐初從征廣西曾國藩創水師調爲哨長四年從楊岳斌下岳州敘千總戰於城陵磯賊以十餘舟來誘翼升知其詐追至擂鼓臺荆阿腦伏賊突出翼升駕舢舨奮擊後隊繼之賊大敗轉戰至金口值賊下游被圍力戰卻之積功擢守備克武漢後進攻蘄州翼升自蒜花埭出戰敗賊焚其舟擢都司復蘄州拔充營官攻湖口燬賊船十餘艘衝入內湖賊塞隘口不得退泊姑塘迭戰於都昌縣河雞公湖焚賊舟時水師在內湖者無大船既與外江阻絕曾國藩令添造並撥江西長龍快蟹諸船以翼升及蕭捷三分領之各爲一軍五年屢會諸軍攻湖口未克蕭捷三戰死翼升大憤衝入賊卡盡燬下鐘巖賊船夜出奇兵數艘賊賊不出仍駐軍姑塘六年賊犯撫州南昌戒嚴翼升奉檄泊吳城鎮衛省城

湖口之賊尾至結土匪窺吳城翼升分兵由前河包鈔自赴後河擊陸路之賊走之會彭玉璽至軍令翼升專攻陸路敗賊於涂家埠毀浮橋二船百餘賊復冒民船來犯翼升合軍圍擊敗之追至德河口遂會攻南康直薄城下火賊船城賊遁走七年授直隸提標左營游擊楊岳斌師至九江彭玉璽與約夾攻湖口軍分六隊翼升率內湖右營當其衝轉鬪而前礮丸冒船過他營失利賊逐之翼升待其還縱擊斬殺過當賊復乘夜劫營滅炬待之殲賊無算燬梅花洲賊船東岸諸軍亦斷湖口鐵鎖遂克湖口內外水師復合越日進奪彭澤賊舟破小孤山擢副將九年池州守城韋志俊投誠彭玉璽令翼升往受降賊酋古隆賢楊輔清等來爭擊卻之旋有奸人內應池州復陷十年曾國藩規江南奏設淮陽水師薦翼升領之即授淮陽鎮總兵十一年破賊於黃盆鎮又敗之方村進攻銅陵決城東北隄從決口入據之又進攻無爲州毀泥汊口神塘河賊壘無爲銅陵同復賜號剛勇巴圖魯偕王明山循沿江郡縣克池州銅陵亦失而復得漕運鎮濱江通湖賊踞之以連接濟翼升進擊諸軍乘之焚賊舟賊

遁銅城牖又偕陳浚攻東關克之加提督銜同治元年追賊入巢湖賊聚湖口以退歸路翼升掘隄岸引船出反撫賊背夾擊大敗之城賊遁進克含山和州四月會攻金柱關李朝斌臨上游翼升等遏下游賊牽於水師不暇內顧曾國荃襲克太平並趨金柱關合攻翼升夜督隊踰濠縱火焚西門賊突出揮士卒登岸短兵接立克金柱關襲東梁山一鼓下之移師攻蕪湖賊棄城走又擊賊清水河俘馘千計以提督記名五月克秣陵關江心洲諸隘血戰奪九洲洲軍聲大振時李鴻章至上海規蘇常翼升移師會剿詔署江南水師提督松江上海諸水軍悉歸節制翼升所部十營分二營駐浦口四營駐揚州親率四營六月抵松江就上海增造舢板飛划諸船移守青浦賊曾譚紹洸合嘉湖蘇崑諸賊圍犯上海屢撲青浦翼升與陸軍合擊走之賊繞犯北新涇大營又走吳淞翼升駛往相持至夜燬賊營七賊犯嘉定及青浦張堰分隊往援且戰且進至白鶴江毀橋而還翼升兵少調揚州駐營來會剿鴻章約合攻黃渡翼升由趙屯橋截擊追至三江口盡平沿岸橋壘十月破賊蘆墟尤家莊汾湖三官塘進

距蘇州三十里常熟守賊駱國忠以城降譚紹洸來爭陷福山翼升赴援進攻河西白茅徐六涇諸口二年正月翼升會常勝軍克福山駱國忠見西山火起突圍出圍乃解楊舍汛爲沿江衝要賊守之以蔽江陰翼升沿江兜剿迭破援賊克之乃會攻江陰迭破蠡口陳市賊酋陳坤書來援翼升扼江干誘賊出戰與郭松林劉銘傳合擊大破之克江陰賜黃馬褂九月由無錫進攻蘇州詔翼升赴臨淮會剿苗沛霖鴻章疏留勿遣諸軍合圍蘇州薄城下當齊門閭門之間截賊竄路城賊乞降予雲騎尉世職是年冬再克無錫率五營赴臨淮苗沛霖尋走死餘黨瓦解翼升仍回江蘇三年陳坤書犯常熟借郭松林等合擊賊敗走遣部將王東華等助攻常州克之被優敘昭授江南水師提督曾國藩奏江南額設提督一員兼轄水陸翼升所授當是新設請敕部鑄頒新印從之會楊岳斌督師江西翼升接統外江水師江寧復加一等輕車都尉世職四年詔翼升赴清江浦防捻匪至則賊已敗竄山東進駐邳宿之間會僧格林沁戰殲捻氛益熾犯雒河翼升駛援賊又走五年回駐江寧六年調守清江東捻賴文

沈敗竄淮安翼升督諸軍追擊文沈爲道員吳毓蘭所禽東捻平論功被珍寶
七年西捻張總愚竄畿輔諸軍爲長圍困之鴻章調翼升率師船入運河設防
六月乘伏汛入張秋口至德州張總愚奔至冒官軍喚渡翼升部將徐道奎察
其偽轟擊之大軍環集總愚溺水死西捻平加雲騎尉世職合併爲三等男爵
長江水師營制定仍以翼升爲提督彭玉璽終制回籍長江事宜悉付翼升主
之十一年詔起玉璽巡閱勅不職將弁百餘人翼升以傷病請代奏乞退詔斥
馭軍不嚴濫收候補將弁二百餘人之多念前功從寬免議許其開缺回籍養
病光緒十五年皇太后歸政以翼升舊勛予議敘繪像紫光閣十八年復授長
江水師提督入覲賜紫禁城騎馬二十年皇太后萬壽慶典加尙書銜日本兵
事起翼升由岳州赴江甯籌江防卒於軍賜卹設武靖立功地建專祠子宗炎
襲男爵官廣西桂平梧鹽法道丁義方湖南益陽人入水師隸彭玉璽部下積
功至守備咸豐八年克九江擢都司十年克建德賜花翎尋建德復陷賊敗萬
上犯湖口勢甚張義方收建德潰兵簡精壯五百人分布守禦自率水師駐西

北門賊乘銳攻城義方登陣躬自搏戰會副將成發翔來援賊引去曾國藩疏
言義方膽識過人部署迅速詔超擢參將加副將銜十一年駐防小池口賊自
興國來犯擊卻之馳援都昌解其圍同治元年從彭玉璽迭克沿江諸隘擢副
將二年要擊都昌敗賊毀其舟尋解青陽圍以總兵記名賜號壯勇巴圖魯七
年授湖口鎮總兵光緒十九年卒官王吉湖南衡陽人由馬兵累擢守備咸豐
九年入水師隸彭玉璽部下從屯黃石磯擊蕪湖賊戰螞蟥磯殷家匯樅陽皆有
功擢都司十一年從克孝威戰最力擢游擊賜號猛勇巴圖魯克德安黃州累
擢副將同治元年金柱關之戰吉率隊蛇行而進躍上陡埂破賊壘以總兵記
名尋賊復由太平來犯多方窺伺吉駕飛划入湖迎擊又登岸馳逐經月餘賊
蹤始淨援無爲州率水勇登陸會諸軍夾擊敗賊破銅城廬水卡結小划船爲
橋以濟陸師復破陶家莆大甲村岷山岡賊壘二年曾國藩彭玉璽合疏薦吉
勇敢誠樸堪勝總兵之任授狼山鎮總兵從克江浦浦口奪下關草鞋峽燕子
磯諸隘進拔九洲洲以提督記名八年水師凱撤乞假修墓乃赴狼山鎮任光

緒七年卒賜卹吳家榜湖南益陽人入水師初隸楊岳斌營咸豐十年從黃翼升破賊殷家匯樅陽遂歸其部下菱湖銅陵泥汊口運漕鎮東關諸戰皆有功累擢守備同治元年從攻金柱關東梁山蕪湖擢都司從黃翼升援上海迭破賊北新涇四江口收援賊於江陰賜號敢勇巴圖魯領淮陽水師前營克無錫擢副將三年江南復錄功以總兵記名四年追敘克宜興荆溪溧陽功以提督記名七年從黃翼升赴直隸防運河擒匪平晉號訥恩登額巴圖魯授瓜州鎮總兵光緒二年兼署長江水師提督十八年卒附祀彭玉慶祠

李成謀字與吾湖南芷江人咸豐四年投効水師充哨長從楊岳斌克湘潭岳州敘千總轉戰湖北敗賊於倒口拔沿江木柵燬鹽關賊船克武漢擢守備從克田家鎮成謀追賊上至武穴下至龍坪往來擊賊殲斃甚衆擢都司五年從戰塘角焚賊舟二百餘乘風夜抵武昌城下破擊賊船擢游擊攻金口循北岸進拔賊壘又連破賊於壇角鮎魚套擢參將賜號銳勇巴圖魯成謀身長八尺力能一手豎大桅素爲胡林翼所器重至是薦其每戰衝鋒廉明愛士堪勝水

陸方鎮之任詔記名俟軍事稍閒送部引見六年扼沙口斷賊糧道破賊小河
口青山燔其輜重轉戰蘄州黃州廣濟武穴下至九江燬賊舟數百獲糧械以
資軍用武漢復擢副將七年會攻九江追賊至湖口前隊銳進失利成謀突入
陣中奪回所失四艘尋授江蘇太湖協副將既克湖口從楊岳斌順流而下登
陸克望江東流疾趨安慶復銅陵會江南水師於峽口紅單船方攻泥汊賊壘
不能下岳斌令成謀急糧薄壘擲火焚其火藥庫賊遁走獲其糧械船艦胡林
翼奏肅清江而成謀之功爲最平日事親孝特給二品封典八年擢福建漳州
鎮總兵十年進攻池州拔殷家匯毀城外賊壘破樅陽僞城加提督銜十一年
陳玉成圍樅陽擊卻之同治元年會陸師拔巢縣雍家鎮薄西梁山斷橫江鐵
鎖奪回要隘以提督記名破賊於魯港采石磯克金柱關蕪湖賜黃馬褂三年
援湖北破捻匪於羅田五年署福建水師提督尋實授時軍事漸定整頓營制
會奏裁金門鎮總兵改爲水師副將裁左營游擊移右營駐湄州歸提標統轄
徙前營游擊駐澄口後營游擊駐金門變通巡哨章程十一年彭玉璽整頓長

江水師罷提督黃翼升薦成謀樸誠堪膺重任卽以代之光緒二年丁母憂奪情留任兩江總督曾國荃奏請江南兵輪悉歸成謀統轄十六年萬壽推恩加太子少保十八年以病乞歸尋卒詔嘉其在任十餘年馭軍有法江面乂安賜卹建專祠賜勇恪

李朝斌字質堂湖南善化人由行伍隸長沙協標咸豐四年曾國藩調充水師中營哨官從楊岳斌克武昌田家鎮各城墜累功擢至參將六年會內湖水師攻克湖口及梅家洲從楊岳斌乘勝循下游掃蕩江面擢副將八年會攻九江朝斌以水師登陸助戰克之復從楊岳斌進攻安慶拔樅陽銅陵賊壘賜號固勇巴圖魯十年冬間道援南陵回軍攻克東流十一年下荻荅洲白茅甯賊壘會陸軍克無爲州以總兵記名再復銅陵迭克泥汊神塘河運漕鎮東關加提督銜授湖北竹山協副將同治元年擢浙江處州鎮總兵彭玉盛督水師會陸軍進規沿江要隘令朝斌率所部游奕上下游兜剿環攻連克金柱關蕪湖東梁山以提督記名曾國藩奏設太湖水師以朝斌將令赴湖南造船募勇二年

成軍東下會諸軍克江浦浦口連破草鞋峽燕子磯賊屯戰九洲功最賜黃馬褂朝斌一師原爲規復江浙而設九洲既克會黃翼升淮揚水師同援上海由長江直下與總兵程學啟會師夾浦督水師百艘攻沿湖賊壘下之進破濟臺湖賊壘直逼蘇州破盤門外賊壘賊酋李秀成率衆七八萬奪寶帶橋朝斌會陸師合擊血戰挫之賊始退破援賊於葉渚湖截竄賊於覓渡橋會克五龍橋賊壘分攻葑門閶門晝夜轟擊李秀成先逸餘黨以城降李鴻章奏捷言朝斌迭次苦戰謀勇兼優予雲騎尉世職是年冬會陸師剿賊江浙之交克平望鎮又破賊九里橋署江南提督三年偕程學啟會攻嘉興朝斌水師由官塘進破其七壘湖州援賊圖竄盛澤以牽圍師爲朝斌所扼不得逞遂克嘉興實授江南提督進規湖州由夾浦逼長興賊衆數萬依山築壘楊鼎勳劉士奇等與之相持朝斌督水師登陸襲賊後夾擊之盡燬西北沿水賊壘乘勝克長興復湖州被珍寶五年移駐蘇州軍事甫平江浙湖蕩盜多出沒捕著匪卜小二誅之轄境晏然八年請設經制水師著爲成例移駐松江光緒四年兩江總督

沈葆楨疏請以外洋兵輪統歸朝斌節制允之十二年以病乞歸二十年卒於家賜卹建專祠朝斌本姓王氏父正儒生子四朝斌最幼襁褓育於李氏朝斌官江南提督時牒請歸宗曾國藩引金史張詩事謂朝斌所處相同定例出嗣之子亦視所繼父母有無子嗣爲斷今若準歸宗王氏不過於三子外又增一子李氏竟至斬焉不祀參考古禮今律朝斌應於李氏別立一宗於王氏不通婚姻一以報顧後之恩一以別族屬之義王氏本生父母由朝斌奉養殘年庶爲兩全之道詔如議行江福山湖南清泉人咸豐五年應募入水師積功敘把總十一克赤岡嶺菱湖賊壘安慶復累擢游擊同治元年改隸太湖水師從李朝斌回籍造船領前營浦口下關草鞋峽燕子磯九洲諸戰皆有功擢參將從援上海破賊於楓涇烏涇塘蘇州復擢副將賜號強勇巴圖魯三年從攻嘉興礮穿左臂裹創而進克郡城禽賊酋以總兵記名攻太湖夾浦鎮礮斷左手指奮擊破之進攻湖州久不下郡東晟舍賊壘最堅請以偏師往攻使賊互救然後大軍乘之福山首先躍濠而入諸軍繼進悉燬賊壘援賊大至福山摧鋒

直前中礮洞腹歿於陣事聞詔視提督例賜卹死事地建專祠入祀京師昭忠祠予騎都尉兼雲騎尉世職諡武烈

劉培元湖南長沙人咸豐初以武生入水師從克湘潭岳州敘千總戰金口沈賊船登岸縱擊斬賊酋一人克嘉魚蒲圻擢守備戰田家鎮培元率十舟窮追四十餘里燬賊船擢都司會攻湖口斧斷鎖筏燬湖口賊船五年回援武漢擊賊鮎魚套又會鮑超攻小河口毀賊舟二百有奇六年改陸軍領長字營從劉長佑援江西由瀏陽攻萬載破賊荊樹鋪栗樹塢駐大橋賊潛來襲培元出奇兵擊之斬級八百又破援賊於高城竹埠克萬載營西門外賊數路來爭多於官軍數倍培元開壁大戰斬級千計擢游擊進攻袁州破南門嶺上賊壘會蕭啓江破吉安臨江援賊城賊遁走克袁州以參將留湖南補用七年會攻吉安偕曾國荃迎擊援賊於三曲灘追至朱山槽賊援復集夾擊破之擢副將八年水陸合攻吉安賊結大筏衝官軍浮橋培元督師船截擊礮傷胸裏創血戰盡毀其筏尋克吉安以總兵記名是年冬軍中大疫培元病回籍九年石達開犯

湖南培元率千人扼桂陽衆寡不敵桂陽遂陷尋率師船溯資水進援寶慶會諸軍扼河而戰數破賊寶慶圍解授浙江處州鎮總兵仍留湖南領水師十一年左宗棠進規浙江立衢州水師疏薦培元熟諳水陸軍事請以署衢州鎮募勇三千赴浙同治元年培元率安武水陸全軍駐常山控衢州北路進江山破大洲賊營賊竄龍游會攻之賊酋李侍賢大股來援培元與諸軍合擊賊敗走二年克陽溪龍游斃賊酋陳廷秀加提督銜賜號銳勇巴圖魯迭克桐廬富陽會攻杭州破賊於萬松嶺攻清泰門外觀音堂平其壘城賊出戰敗之昇舳舨入西湖礮擊杭城左宗棠以衢州後路要衝令培元返鎮其所部水師留攻杭州三年杭州復培元丁母憂歸遂不出光緒十七年卒湖南巡撫陳寶箴疏陳培元戰蹟賜卹

論曰自湘軍水師興而後得平寇要領後又設淮揚太湖兩水師平吳及浙西賴其力黃翼升李朝斌當其任其後設長江水師爲經制翼升與李成謀迭相更代爲東南重鎮平浙東專在陸師故水師僅有衢州一軍劉培元亦彭楊舊

部戰績可稱用並列之

清史稿

列傳二百三

程學啟

劉銘傳

張樹珊

周盛波

周盛傳

潘鼎新

吳長慶

程學啟字方忠安徽桐城人初陷賊中陳玉成奇其勇使佐葉芸來守安慶咸豐十一年率三百人自拔來歸曾國荃使領一營戰輒請先安慶北門石壘三最堅學啟力攻拔之絕賊糧道未幾遂克安慶學啟功最擢游擊賜花翎從國荃克無爲銅陵諸城擢參將同治元年李鴻章率淮軍規江蘇請於曾國藩以學啟隸麾下瀕行國藩勉之曰江南人知張國樑不去口汝好爲之亦一國樑也三月抵上海立開字營凡千人最爲勁旅屯虹橋賊猝至敗之次日又至擊退追至七里堡大破之會諸軍克南鎮橋五月從鴻章援松江軍於泗涇賊曾陳炳文糾悍黨突營分股繞攻上海學啟營被圍力禦斃賊無算仍不退學啟

開壁衝突賊披靡與諸軍夾攻乃大潰松江圍解擢副將賜號勃勇巴圖魯進破賊於青浦東北復其城八月賊曾譚紹洸由蘇州來犯敗之七寶鎮進戰北新涇平其壘數十以總兵記名九月紹洸復大舉窺上海圍水陸各營於四江口學啓會諸軍進擊賊扼橋布陣學啓陷陣截斷賊隊胸受礮傷裹創疾鬪賊卻走未渡河者悉殲之三路圍擊殲斃落水者數萬盡毀賊營以總兵記名加提督銜授江西南贛鎮總兵自虹橋涇四江口三捷皆以少擊衆於是增軍至三千人二年進規蘇州偕鴻章弟鶴章及英將戈登克太倉賊酋蔡元澄詐降擊殲之鴻章令學啟總統諸軍學啟曰崑山三面阻水一面陸路達蘇州先斷其陸乃可克偕郭松林破蘇州援賊於正義鎮遂克崑山以提督記名予一品封典連拔花涇同里克吳江賊憑太湖結寨學啓扼飛虹橋殲其酋徐尙友乘勝破湖賊悉平洞庭東山諸壘七月直抵蘇州婁門外永定橋駐軍蘇州城大四面阻水竇帶橋爲太湖鎖鑰賊死力爭拒合水陸軍大破之平其壘親督軍扼守李秀成自江甯率衆來援大戰竟日擊走之城賊數萬復來爭亦擊退

進破五龍橋賊壘留營駐守分兵破嘉湖援賊於百龍橋八圻逐北至平望十月李秀成糾李侍賢同踞無錫以爲援爲劉銘傳李鶴章所綴學啟督戰益急連破賊於蠡口黃埭攻破滄墅關及十里亭虎邱賊壘於是蘇州之圍遂合賊自盤門至婁門連壘十餘里號曰長城亦悉破秀成知不可爲又江甯被圍急遂以城守付其黨譚紹洸自出走賊曾部雲官與副將鄭國魁舊識密介通款學啟與國魁及戈登單舸見雲官於洋澄湖令斬紹洸爲信秀成行三日紹洸會諸曾議事雲官即座上殺之開齊門降明日學啟入城賊酋列名者八人雲官外曰伍貴文汪安均周文佳范啓發張大洲汪懷武汪有爲皆歃血爲誓然未雉髮乞總兵副將官職署其衆爲二十營劃半城爲屯學啟佯許密請李鴻章誅之鴻章謂殺降不祥且堅他賊死拒心未決學啟曰今賊衆尙不下二十萬多吾軍數倍徒以戰敗畏死乞降心故未服分城而處變在肘腋何以善其後鴻章乃許之次日諸酋出城謁鴻章留宴軍中酒半健卒百餘挺矛入刺八人皆死學啟嚴陣入城以雲官等首示衆曰八人反側已伏誅矣賊黨驚擾殺

其悍者數百人餘不問分別遺留皆帖服蘇州平乘勝偕李朝斌水師克平望復嘉善三年春進規嘉興薄城下破西門北門賊壘七分兵克秋涇吳涇合歡橋諸賊壘逼賊築礮臺賊自盛澤新塍來援皆擊走之圍攻而月毀賊礮臺二十餘發地雷裂城百丈揮軍肉薄而登忽中槍貫腦踣而復起部將劉士奇繼之遂克嘉興捷聞詔嘉其身受重傷攻拔堅城命安心醫治頒賞珍品尋以創重卒於軍李鴻章疏陳其兩年之間復江浙名城十數克蘇州爲東南第一戰功優詔賜卹稱其謀勇兼優贈太子太保特遣員賜祭一壇安慶蘇州嘉興建專祠諡忠烈予騎都尉兼雲騎尉世職又加恩予三等輕車都尉世職併爲三等男爵初學啟投誠時妻子皆爲賊殺以弟子建勳嗣襲爵何安泰安徽舒城人少爲傭陷賊從學啟來歸轉戰無役不從積功至記名總兵加提督銜從攻嘉興履冰薄城躍登中槍死之贈太子少保子騎都尉世職嘉興人哀之爲祠以祀鄭國魁安徽合肥人咸豐十年兩江總督何桂清令募勇屯無錫高橋桂清棄軍走國魁從提督曾秉忠於上海初李鴻章督師江蘇檄領親兵水師後

營四江口崑山寶帶橋諸戰功皆最累擢至副將蘇州既合圍邵雲官與譚紹洸不協國魁遣人說之降從程學啓會雲官許雲官等二品武職折箭誓不殺降雲官如約獻城國魁先往宣諭次日大軍始入既而雲官等駢誅國魁涕泣不食自謂負約辭不居功仍以總兵記名賜號勃勇巴圖魯從克嘉興江陰常州予一品封典同治五年從勦東捻駐防山東驛縣捻平以提督記名光緒中署天津鎮總兵卒附祀學啓專祠蘇州士民思其功建祠祀之

劉銘傳字省三安徽合肥人少有大志成豐四年粵匪陷廬州鄉團築堡自衛其父惠世爲他堡豪者所辱銘傳年十八追數里殺之自是爲諸團所推重從官軍克六安援壽州獎敘千總同治元年李鴻章募淮軍援江蘇銘傳率練勇從至上海號銘字營招撫南漚降賊吳建瀛劉玉林衆四千人簡精銳隸其軍賊由川沙來犯擊敗之連克奉賢金山衛累功擢參將賜號驍勇巴圖魯又破賊野雞墩四江口擢副將常熟守賊以城降被圍二年春銘傳會諸軍克福山大破賊解常熟圍以總兵記名進規江陰楊厘爲沿江要衝悍賊堅守銘傳會

黃翼升水師進攻賊由無錫江陰兩路來援迭受創退李秀成糾衆十餘萬分水陸復來援銘傳力戰敗之七月乘勝攻江陰禽斬二萬克其城以提督記名尋復無錫加頭品頂戴是年冬進攻常州敗賊於奔牛鎮賊目邵小雙降令扼丹陽援賊以輪舟至犯奔牛以掣圍城之師奮擊破三十餘壘毀其舟三年春合圍破圍而入禽斬賊首陳坤書克常州賜黃馬褂進屯句容江甯尋下餘黨擁洪福瑱踞廣德會諸軍擊走之四年會國藩督師剿捻匪主用淮軍淮軍自程學啟歿後銘傳爲諸將冠調駐濟甯尋分重兵爲四鎮銘傳移駐周家口迭破賊瓦店南頓扶溝改爲移擊之師擢直隸提督援湖北克黃陂追賊至潁州大敗之銘傳建議平原追賊不能制其死命乃築長隄自河南至山東連河驅賊沙河以南燧之工甫竣豫軍防地爲賊所破乃分軍追勦破之於鉅野捻酋張總愚竄陝西任柱賴文光留山東自此分爲東西李鴻章代國藩督師銘傳專剿東捻東至鄆城西至京山大小數十戰六年春賊走尹隆河與鮑超約期會擊銘傳先期至戰失利部將唐殿魁死之休屯信陽整軍復進追賊至山東

復議自運河至膠萊長圍困賊杜其西趨時兵賊俱疲朝命督戰益急鴻章專倚銘傳八月解沭陽圍戰贛榆降賊內應槍斃任柱於陣賊大潰遂擊濰縣壽光薄之洋河濰河之間殲賊幾盡賴文光走揚州就禽東捻遂平國藩鴻章奏捷論銘傳爲首功予三等輕車都尉世職以積勞致疾乞假去軍七年春張總愚突犯畿輔急起銘傳赴援以遲緩被譴責及至東昌會諸軍進剿鹽山滄州德平仍用長圍策蹙之運河東縱橫合擊殲賊殆盡總愚走在平陷水死西捻平錫封一等男爵詔屯張秋九月命督辦陝西軍務率唐定奎滕學義黃桂蘭等搜剿北山回匪疏陳大勢引病乞罷歸里光緒六年俄羅斯議還伊犁有違言急備邊召銘傳至京疏陳兵事略謂練兵造器固宜次第舉行其機括則在鐵路鐵路之利不可殫述於用兵尤爲急不可緩中國幅員遼闊防不勝防鐵路一開南北東西呼吸相通無徵調倉皇之慮無轉輸艱阻之虞從此裁兵節餉併成勁旅一兵可得十兵之用權操自上不爲疆臣所牽制立自強之基礎杜外人之覬覦胥在於此疏上雖格未行中國鐵路之興實自銘傳發之十

一年法蘭西兵擾粵閩詔起銘傳加巡撫銜督臺灣軍務條上海防武備十事
多被採行抵臺灣未一月法兵至燬基隆礮臺銘傳以無兵艦不能海戰同登
陸戰於山後殲敵百餘人斃其三酋復基隆而終不能守扼滬尾調江南兵艦
阻不得達敵三犯滬尾又犯月眉山皆擊退殲敵千餘相持八閱月十一年和
議成法兵始退初授福建巡撫尋改臺灣爲行省改臺灣巡撫增改郡廳州縣
改澎湖協爲鎮檄將吏入山剿撫南中北三路前後山生番薙髮歸化丈田清
賦溢舊額三十六萬兩有奇增茶鹽金煤林木諸稅始至歲入九十餘萬後增
至三百萬築礮臺興造鐵路電綫防務差具加太子少保十六年加兵部尙書
銜命幫辦海軍事務屢因病陳請乞罷久始允之二十一年朝鮮兵事起屢召
以病未出尋卒詔念前功贈太子太保賜卹建專祠諡壯肅

張樹珊字海柯安徽合肥人咸豐二年粵匪入安徽樹珊與兄樹聲練鄉兵自
衛淮軍之興自張氏始五年擊賊巢湖率壯士數十人敗賊禽斬賊目五人進
破巢縣賊營敘外委六年復來安隨官軍克無爲州擢千總又克潛山至太湖

遇賊數萬樹珊僅五百人軍糧火藥皆盡賊屯隄上樹珊選死士緣隄下蛇行入賊中大呼擊殺賊驚潰七年敗擒首張洛行於官亭粵匪方與擒相句結皖北幾無完區獨合肥西鄉以團練築堡差安時出境從剿賊九年克霍山十年兩解六安圍十一年赴援壽州克三河壩都司賜花翎同治元年從李鴻章赴上海名其軍曰樹字營李秀成犯上海會諸軍夾擊走之七年會克青浦賊圍北新涇樹珊偕程學啟力戰旬餘賊始遁擄游擊進克嘉定賊大舉圍四江口樹珊偪賊而營會諸軍奮擊連破二十餘壘遂解圍擄參將賜號悍勇巴圖魯是年冬常熟及福山賊以城降而福山賊復叛圍常熟二年正月樹珊率軍航海抵福山西洋港風潮作飄舟近賊巢潮退不得行樹珊曰兵法危地則戰登岸結壘未就賊大至樹珊疾擣中堅槍傷左肘不少卻拔出諸營之被圍者進解常熟之圍擄副將會諸軍進攻江陰樹珊扼南門斷賊去路城復賊無得脫者以總兵記名進攻無錫悍酋陳坤書李世賢方以十萬衆圍大橋角樹珊助剿火賊輪船二礮船十殲斃甚衆解其圍李秀成復率衆數萬至連營數十里

樹珊與諸軍夾擊賊大潰會蘇州已下秀成率死黨入太湖結常州賊水陸分進援無錫時銘傳專擊外援賊樹珊與諸軍合圍十一月拔之以提督記名偕兄樹聲及劉銘傳進攻常州三年四月克之予一品封典授廣西右江鎮總兵四年曾國藩督師剿捻駐徐州以樹珊所部爲親軍令援山東破賊於魚臺議設四鎮陳州之周家口爲最要初以劉銘傳駐之既改銘傳爲游擊之師乃令樹珊移駐五年三月擊賊沙河賊竄撲周家口回軍夾擊敗之五月又敗賊於沙河東樹珊以賊騎飄忽靡常恥株守請改爲游擊之師九月馳解許州之圍十月逐賊山東境連敗之豐南定陶曹縣十一月回軍周家口賊竄湖北偕總兵周盛波追剿會郭松林敗績於白口賊燄愈熾樹珊自黃岡追至棗陽賊竄黃州德安樹珊馳援諸將皆言賊悍且衆宜持重樹珊率親軍二百人窮追抵新家牯賊橫走抄官軍後樹珊力戰陷陣至夜半馬立積屍中不能行下馬鬪而死後隊據鄉莊發槍礮拒賊賊亦尋退全軍未敗事聞詔惜其忠勇從優議卹予騎都尉兼一雲騎尉世職建專祠諡勇烈七年捻平加贈太子少保弟樹

屏從諸兄治團練積勞至千總從樹珊至江蘇轉戰松江蘇州常州屢有功累擢副將從剿捻匪迭破賊於豐縣沛縣魚臺及樹珊戰歿德安樹屏分領樹字三營駐周家口東捻平論功以提督記名賜號額勝額巴圖魯同治六年山西巡撫李宗義奏調令募新軍六營分駐大寧吉州壺口防回匪十二年兼統水陸駐河津分防歸化包頭光緒二年甘肅流賊犯河套後山督軍追擊連敗之禽其渠曹洪照事平加頭品頂戴四年授太原鎮總兵值旱災樹屏捐運賑糧出軍食之餘平糶濟饑民六年移防包頭九年調大同鎮十三年因傷病乞罷十七年卒以前勞賜卹

周盛波字海舫安徽合肥人咸豐三年粵匪陷安慶皖北土匪紛起盛波兄弟六人團練鄉勇保衛鄉里屢出殺賊兄盛華及弟三人皆死事惟存盛波與弟盛傳以勇名陳玉成陳得才等屢擾境盛波等以練丁二千隨方迎敵相持數年遂越境出剿近縣餉械皆所自備累獎守備同治元年李鴻章募淮軍援江蘇令盛波就所部選募成軍曰盛字營從至上海破賊於北新涇擢游擊又大

破賊於四江口賜號卓勇巴圖魯二年克太倉進崑山扼雙鳳橋復縣城破麥市橋賊壘擢副將進攻江陰擊敗援賊會克縣城以總兵記名會攻無錫燬賊船百餘破惠山石卡禽賊曾黃子澐以提督記名予一品封典二年合圍常州盛波由小南門攻入賊首就禽以總兵儘先題奏時江甯已復餘黨黃文英走踞廣德盛波追之至橫山文英遁走城賊拒戰敗之復廣德進至甯國境而還賜黃馬褂四年從曾國藩剿捻匪張總愚圍雒河集盛波赴援循渦河岸破賊英翰軍突圍夾擊圍始解授甘肅涼州鎮總兵敗捻匪於甯陵五年拔荷澤游莊寨方埠賊巢被珍寶牛洛紅竄亳州截擊於白龍王廟大破之是年冬追賊雲夢連敗之於兩河口沙河胡家店六年躡追任柱至信陽與弟盛傳分路蹙之台子畝山中賊舍騎四竄追及談家河禽賊目汪老魁等賴文光來援復擊敗之九月破流陽程寨賊又敗之於石榴寨高家寨追至海州阿胡鎮殲悍黨趙天幅東捻尋平七年西捻張總愚竄幾輔盛波追至陵縣土橋馬步合擊賊潰走五月盛波駐毛家莊賊由吳橋來犯設伏痛擊斬級數千襲賊於楊丁莊

陣斬總愚之姪張三彪六月會擊於在平總愚走死西捻平晉號福齡阿巴圖魯軍事定以母老陳請回籍終養尋以前年所部攻破河南唐縣民寨慘斃多命爲巡撫李鶴年所劾職交李鴻章按治以盛波身在前敵免其科罪九年鴻章疏陳盛波功多復原官十年命在淮北選募精壯十營赴天津備防責司訓練丁母憂奏許弟盛傳回籍治喪盛波仍留營盛傳尋卒所遺湖南提督即以盛波代署疏辭不允服闋實授十四年卒李鴻章疏陳戰績謂其治軍嚴而不苛人樂爲用善察地勢審賊情部曲經其指授輒有家法防海以來所部爲淮軍最大之軍諸軍助望無出其右詔優卹建專祠設剛敏

周盛傳字薪如盛波之弟盛傳偕諸兄集丁壯團練咸豐三年粵匪擾合肥率百餘人擊敗之禽賊目馬千祿五年兄盛華陣亡盛傳與盛波分領團衆防戰數有功獎敘把總十一年赴援壽州擢千總同治元年盛波從李鴻章援江蘇盛傳充親兵營哨官從克嘉定及戰四江口累擢游擊三年回籍增募勇丁會攻太倉賊曾蔡元澂詐降設伏狙擊官軍盛傳獨嚴備不爲所挫越數日偕諸

軍一鼓克之駐軍雙鳳鎮爲賊所圍連戰三晝夜破之克崑山賜號勳勇巴圖魯攻江陰毀東門賊營城復擢參將迭戰東亭鎮興隆橋鳴城橋西倉遂克無錫功尤多超擢以總兵記名進攻常州三年進逼郡城南門賊突出拒盛傳且戰且築營賊屢抄後路皆擊退登石橋督戰橋斷墮水又受礮傷絕而復甦越數日裹創會攻擊城先登克常州詔以總兵遇缺先行題奏加提督銜以撫標親兵三營改爲傳字營盛傳始獨領一軍移防溧陽尋會銘軍克廣德州四年調剿捻匪偕兄盛波援雉河集自睢甯宿州轉戰而前將至捻酋任柱以馬隊突犯盛傳堅陣不動出奇兵抄賊後賊始卻會諸軍夾擊賊潰走以提督記名移防歸德五年春迭敗賊於考城鉅野城武荷澤詔嘉盛傳兄弟苦戰同被珍賚五月偕盛波破牛洛紅於亳州洛紅被創夜遁道死追賊扶溝郟陵許州扼防周家口時以長圍困賊盛傳築賈魯河長牆檄調爲游擊之師解柘城羅山圍六年授廣西右江鎮總兵偕盛波暨賊信陽譚富河斬賊逾萬追賊入山東至江北海州捻匪大衰是年冬任柱賴文光均就殲七年春偕盛波渡河會剿

張總愚敗賊於山東直隸之間守運河長墻盛傳伏炸礮於吳橋毛家莊合馬步逼賊入伏礮發賊屍蔽野既而在平台圍總愚走死賜黃馬褂盛波乞假養親盛傳代統全軍從李鴻章移師湖北九年從鴻章赴陝西剿回匪賊踞宜川山中督軍進剿破之於河兒川孔巖寨分兵於宜洛鄜延之間以遠勢兜圍先後禽賊酋馬志龍戴得勝北山悉平是年秋鴻章移督直隸疏調盛傳率所部屯衛畿輔十年移屯青縣馬廠十二年興修大沽北塘礮臺築內外土城各一大礮臺三環置小礮七十有一兵房藥庫倉厰義塾及城外溝河橋樞悉備以所部任其役捐盛軍欠餉以濟工費十三年九月工竣詔遇提督缺出先行簡放時鴻章奉敕興復京畿水利盛傳任事津沽屯田事履勘天津東南縱橫百餘里沮洳蕪廢議疏濬潞河渠引淡滌鹹以變斥鹵光緒二年調天津鎮移屯興工開南運減河自靳官屯抵大沽海口減河兩岸各開支河一橫河六溝滄河渠悉如法建橋樞五十餘處備蓄洩使淡水鹹水不相滲混成稻田六萬餘畝濱河斥鹵地沾水利可墾以億計至六年工竣八年擢湖南提督仍留鎮訓

練士卒悉用西法著操槍章程十二篇軍中以爲法式十年丁母憂命改署理予假回籍治喪盛傳事親孝未幾以哀毀傷發卒詔優卹諡武壯建專祠

潘鼎新字琴軒安徽廬江人道光二十九年舉人議敘知縣咸豐七年投効安徽軍營從克霍山擢同知十一年父璞領鄉團助剿被執不屈死鼎新誓殺賊復仇請分兵攻三河鎮克之負父骸歸曾國藩聞而壯之時方創淮軍今募勇立鼎字營同治元年從李鴻章援上海連克奉賢川沙南匯以知府用克金山又破賊虹橋擢道員二年攻福山鎮鼎新以開花礮炸賊壘克之解常熟圍授江蘇常鎮通海道以父喪未除改署任連破賊於楓涇及嘉善西塘加按察使銜克平湖乍浦海監獲賊銀三十餘萬兩充餉破賊於興城沈蕩新豐三年會克嘉興戰吳淞南潯會攻湖州賊拒守晟舍攻兩晝夜傷酋破昇山九壘奪三里橋直抵城下克湖州加布政使銜賜號敢勇巴圖魯蘇浙既定賜黃馬褂駐屯松江四年僧格林沁戰歿捻匪益熾畿輔震動詔徵勁旅入衛李鴻章遣鼎新率礮隊航海赴天津尋命所部十一營移駐濟甯擢山東按察使擊敗捻首

賴文光於豐縣陳家莊又追敗之於沛縣魚臺定陶五年敗賊於鉅野解鄆城圍築運河沿岸長牆開黑風口淤河引泗水灌之賊屢敗於西華太康竄至油坊岡鼎新夾擊殪其酋又追賊鄆城荷澤曹縣東明竄入河南境追擊於杞縣柿園嘉祥臥龍山六年遷山東布政使築新河濰河長牆會諸軍守之賊由東軍汛地偷渡濰河衝出南竄都司董金勝率馬隊尾追敗之莒州沭陽鼎新追至海州石榴橋據山下擊時賊尙五六萬連戰於馬陵山臥龍寨賊張兩翼來犯鼎新爲圓陣賊不能撼伺懈突擊斬馘甚衆追敗之剡城柴戶店海州上莊斬級千餘殪賊目楊天燕陳天福其酋李宗世等乞降加頭品頂戴捻首任柱賴文光先後就殲禽七年馳援畿輔鼎新至饒陽賊趨保定繞其前迎擊敗之尋破賊於滄州郭橋柳橋殪其酋羅六又戰高唐吳橋於捷地開減河築長牆抵東昌迭殲賊於德平陽信商河與諸軍合擊西捻平予雲騎尉世職晉一等輕車都尉尋命從左宗棠剿回匪鼎新請開缺省親九年丁母憂服闋李鴻章奏留辦天津海防十三年授雲南布政使光緒二年就擢巡撫與總督劉長佑

不合三年命來京另候簡用乞假歸五年召天津隨辦防務七年回籍十年法越兵事起起署湖南巡撫調授廣西巡撫時徐延旭出關兵挫故以鼎新代之命按治提督黃桂蘭等失律罪讞擬經嚴旨斥責命督軍進諒山扼屯梅谷松堅牢諸隘鼎新奏請諸軍歸雲貴總督岑毓英節制自爲之副不允又私謂終歸和局以節餉爲主不得士心初戰船頭紙作社奏捷十二月法兵大舉來犯諒山陷師退自請治罪詔帶罪立功十一年正月鎮南關失守總兵楊玉科戰死喪提督劉恩河以次十餘員鼎新傷肘墜馬倉皇失措退至龍州詔奪職法兵由芄封窺龍州賴馮子材蘇元春王德榜諸軍力戰大破之復鎮南關追躡連捷克諒山和議旋成鼎新乃解任回籍十四年卒於家李鴻章疏陳前功乞恩復原官

吳長慶字筱軒安徽廬江人父廷香在籍治團練咸豐四年殉寇難卹子雲騎尉世職見忠義傳長慶襲世職繼父領鄉團先後從官軍克廬江舒城擢守備十一年會攻克三河淮軍始創領五百人曰慶字營同治元年從李鴻章至上

海破賊於虹橋克奉賢南匯川沙又破寶山竄賊超擢游擊二年回籍募勇會
李秀成糾衆圍廬江長慶登陴固守出擊賊走之事定率新募五營赴上海進
攻楓涇西塘克之毀千竄賊巢擢副將規嘉善破張涇滙賊壘三年會攻嘉興
左臂中槍督士卒緣城上克之以總兵記名賜號力勇巴圖魯自是分兵援浙
闔迭克郡縣五年追叙以提督總兵儘先題奏七年從李鴻章剿捻匪轉戰河
南內黃滑溶山東臨邑德州直隸甯津捻平賜黃馬褂晉號瑚敦巴圖魯調防
江北駐軍徐州八年鼎軍譚變長慶扼截斬其倡亂者衆懼服分別資遣數千
人旬日而定事聞予議叙九年移駐揚州丁母憂予百日假仍留軍濬鹽河興
水利尋復移屯江浦江陰十三年增募四營築江陰江甯礮臺光緒元年授直
隸正定鎮總兵仍留防江南六合鄉民因漕重聚衆譁署長慶馳至諭散爲請
奏減漕額甯國教民白會清不法激變燬教堂構訟建平人何渚被枉長慶往
按得實爲白於總督沈葆楨平反之率士卒濬江浦黑水河四泉河玉帶河兩
年始畢工六年擢浙江提督尋調廣東水師提督未之任會法越軍事起命幫

辦山東軍務四鎮皆歸節制率所部屯登州八年朝鮮內亂禁軍犯王宮殺大臣王妃失蹤燔日本使館日本且發兵命長慶率兵艦三往按治先日兵至廉知事由朝鮮王父大院君李是應所主至則是應尙踞王宮來謁留語及暮遣隊擁赴海口令兵艦致之天津次日擊散亂黨迎復王妃日本初欲藉故多所要挾見事已定氣爲之沮詔嘉其功予三等輕車都尉世職遂留鎮漢城長慶在朝鮮兩年修治道塗救災卹民示以恩信國人感之十年命移防金州尋卒詔優卹建專祠設壯武子其次子保初主事保初後官刑部上書言時政辭職歸長慶好讀書愛士時稱儒將保初亦文雅有父風

論曰李鴻章創立淮軍一時人材蔚起程學啟實爲之魁功成身殞開軍遂微銘軍最稱勁旅樹軍盛軍鼎軍亦各驂靳粵寇平而捻匪熾曾國藩欲全湘軍末路主專用淮軍平捻多賴其力其後北洋籌防全倚淮軍而以盛軍爲之中堅劉銘傳才氣無雙不居人下故易退難進守臺治臺自有建樹二張二周治軍皆有家法潘鼎新防邊失律不保令名吳長慶戰績雖亞諸人朝鮮定亂能

弭大變及甲午邊釁起宿將彫零衛汝貴葉志超等庸才僨事爲全軍之玷後起僅一聶自成庚子殉難淮軍遂燬四十年中盛衰得失於此見焉